

dudit moys de janvier, ont esté jettées et faictes quatre clouches par maistre Jehan Gauchet.

La premiere desdites clouches poyse XVI quintaux, la seconde XIII quintaux, la troisième X, la quatriesme VI; lesquelles clouches ont esté faictes de deux aultres grosces cloches, l'une appellée Bontemps et l'autre Froment, de la pesanteur de XXIII quintaux, qui estoient demeurés par la grace de Dieu et despit et rage des Huguenaux et adversaires de nostre sainte foy catholique, lequel ne les sceurent oncques rompre ny faire bruler, combien qu'ils avoient mys le feu dans le cloucher où elles estoient; aussi avec d'aultres piesses de métal des aultres petites clouches que ceulx de ceste ville de Belleville avoient remises, et six centz six livres que ledit maistre Gauchet a fourny de son métal, et at heu pour la fascon desdites cloches, sans comprendre ledit mettall qu'il a fourny, III^{xx} liv. t.

BÉNÉDICTIONS DE DEUX DES DITES CLOCHES, 1573

L'an que dessus et le vandredi XVI^e jour dudit moys de janvier, ont esté bénittes deus des dites clouches sus nommées, à sçavoir, la seconde après la plus grosse, de la pesanteur de XIII quintaux, et luy at esté imposé nom Marie par sa marreine, honorable fame dame Cybille Devigne, à present femme de maistre Benoist Barmond, prévost de ceste ville: li autre qui at esté bénite le dit jour est la trisiesme, de la pesanteur de X quintaux, et at esté imposé nom Anne par sa marreine honorable Cybille Pierrier, femme de honorable Claude Machet.

AULTRE BÉNÉDICTION DE CLOCHE

L'an que dessus, le lundy XIX^e jour dudit moys, at esté bénicte la quatriesme des moingdres des susdites cloches, pesant environ six ou sept quintaux, et luy a esté imposé nom Charlotte par sa marreine, madame Charlotte Deron, à présent femme de monsieur de l'Escluze.

AULTRE BÉNÉDICTION DE CLOCHE

L'an et jour que dessus at esté bénicte la plus grosse et première desdites cloches pesant environ quinze ou seze quintaux, et luy at esté imposé nom Bontemps par maistre Benoist Barmond, prévost de ceste ville, son parrain; et at esté marreine la susdite nommée dame Cybille Devigne, femme dudit maistre Barmond, et at donné une nappe pour servir à l'honneur de Dieu dans son esglize

Pour copie conforme: GEORGES GUIGUE.